

# TEZAUUR LITURGIC

6 MAI

# ACATISTUL SF. DREPT IOV



TBILISI, 2000



# დაუჯდომელი საგალობელი წმიდისა იოზ მრავალვანებულისა

## კონდაკი 1

უფლის მიერ აღრჩეულსა დიდსა მართალსა ძუელისა  
აღთქუმისასა გიგალობთ მორწმუნენი და საფარველსა  
შენსა შევკედრებთ თავთა ჩუენთა, ხოლო შენ,  
ვითარცა გაქუს კადნიერებაი ღმრთისა მიმართ,  
შეგვაწყნარე სახიერებასა მისსა, რაითა ვნებათა  
ჩუენთა ღელვანი დააყუდოს და ნავთსაყუდელსა მას  
ცხორებისასა წარგვიმართოს შემსხმელთა შენთა და  
მგალობელთა: გიხაროდენ, მრავალვანებულო იოზ,  
ყოვლადსაკვირველო მოძღვარო სოფლისაო!

## იკოსი 1

სიმრავლესა მას შინა საუკუნეთასა ჰნათობს წმიდაი  
სახელი შენი, მართალო იოზ, რომელი ეგე  
მრავალვანებათა დათმენითა, და ეშმაკის ძლევითა და  
სირცხვილეულ-ყოფითა მაუწყებელ და წინასახე იქმენ  
ქრისტეის ვნებისა და მის მიერ ჯოჯობეთის  
შემუსრვისაი, აწ აღგძრავთ მეოხებად მისა მიმართ,  
რაითა ეკლესიაი თვისი დაიცვას და მღდელნი  
ერიოთურთ განამტკიცოს შეურყეველად, რაითა

ყოველნი ერთობითა ვილუწიდეთ სადიდებელად მისა და გნატრიდეთ შენ ძალსაებრ ჩუენისა:

გიხაროდენ, აბრაჰამითგან ესავის ძეთა შორის მეხუთეო, კეთილისა სახელისა მომგებელო;

გიხაროდენ, საღმრთოისა მის წინა-განგებისა ახოვნად თავს-მდებელო;

გიხაროდენ, ვარსკულავო ელვარეო, ხსნისა მეძიებელთათვის გზისა წარმმართველო;

გიხაროდენ, განწირულთა სასოო და დაცემულთა აღმმართველო;

გიხაროდენ, ვნებათაგან დაბრძობილთა თუალთა სულისათა აღმხელელო;

გიხაროდენ, ცოდვისმოყუარეთა კაცთათვის თავშეკავების სიტკბოებისა მასწავლელო;

გიხაროდენ, შენდამი შემოწირულისა ლოცვისა მოწყალებითა შემწყნარებელო;

გიხაროდენ, სოფლისა ღელვათაგან შერყეულთა და შეგინებულთა გულთა დამამშვიდებელო;

გიხაროდენ, ძალითა სულისა შენისაითა ზუავთა და ამპარტავანთა დამამხობელო;

გიხაროდენ, მრავალვნებულო იობ, ყოვლადსაკვირველო მოძღვარო სოფლისაო!

## ონდაკი 2

იყავ რაი მართალ და მოწყალეი, ღმრთისმოშიშ, ჭეშმარიტ და განშორებული ყოვლისაგან ბოროტისა, შეგიყუარა შენ უფალმან სათნოებათათვის შენთა, და განამრავლა რაი საცხოვარი შენი, გაკურთხა შვილთა სიმრავლითა, ხოლო უხუცესნი და მთავარნი მორჩილ-ყო რაი სიტყუასა შენსა, მართალო იობ, იყავ ქალაქსა მას, ვითარცა ერთი მთავართაგანი, და მარადის აქებდი ღმერთსა: ალილუია.

## იკოსი 2

ხედვიდა რაი მთავარი იგი ბნელისაი მართალსა ცხორებასა შენსა, ანგელოზთა თანა წარსდგა წინაშე ღმრთისა, და მსმენელი ქებისა შენისაი განრისხდა და გწამებდა ცილსა, ვითარმედ „თაყუანს-სცემდი ღმერთსა სიკეთეთათვის ქუეყნიერთა“, და აჰა, მისცა უფალმან სახლეული და მონაგები შენი ხელთა შინა მისთა, რაითა ვითარცა ოქროი განგწმიდოს მწუხარებათა და სალმოებათა ცეცხლისა მხურვალებითა, გარნა შეხებაი შენი აღუკრძალა, რაისთვისცა ვადიდებთ საცხოვნებელსა განგებულებასა ღმრთისასა და მოგიძღუნით საგალობელსა ქებისასა:

გიხაროდენ, თავად უფლისაგან უბიწოდ და  
ღმრთისმოსავად წოდებულო;

გიხაროდენ, სიმდიდრითა და ძლიერებითა  
ამაღლებულო;

გიხაროდენ, ქუელის-საქმეთათვის პატივდებულო;

გიხაროდენ, ყოველთა მკვიდრთა შორის ქუეყანისათა  
უფროის მაღლმოსილო;

გიხაროდენ, ქურივ-ობოლთა ნუგეშინის-მცემელო და  
უცხოთა შემწყნარებელო;

გიხაროდენ, შიშუელთა შემმოსველო და გლახაკთა  
გამომზრდელო;

გიხაროდენ, შორის მონათა და მფლობელთა მათთა  
სამართლითა განმგებელო;

გიხაროდენ, შვილთა შენთა ღმრთისმოსავობასა შინა  
აღმზრდელო;

გიხაროდენ, ღმრთისაგან ყოველთა ქუეყნიერთა  
სიკეთეთა მიმღებელო;

გიხაროდენ, მრავალვნებულო იობ,  
ყოვლადსაკვირველო მოძღვარო სოფლისაო!

### კონდაკი 3

მოილო რაი ნებაი განცდისა შენისაი ღმრთისაგან,  
მოსრნა შვილნი შენნი ეშმაკმან, სასტიკითა ქართა  
დაამხო რაი სახლი მათ ზედა, და ყოველი მონაგები  
და საცხოვარი შენი წარწყმიდა ჟამსა მას მცირესა,

ხოლო შენ დაიპე რაი სამოსელი თვისი, მიწაი დაისხ თავსა თვისსა, და მწარედ ლაღადყავ: „შიშუელი გამოვედ მუცლითგან დედისა ჩემისა, და შიშუელიცა განვიდე მუნვე, რამეთუ რაიცა მომცა ღმერთმან, მანვე მიმიღო“, და აკურთხევდი წმიდასა სახელსა მისსა: ალილუია.

### იკოსი 3

ჰოი, საკვირველი ეგე სიმტკიცეი და სიყუარული შენი ღმრთისა მიმართ, ვერცალა შეარყია რაი სულმან ბოროტმან, და კუალად წარდგომილმან წინაშე მისა რქუა კადნიერად: „მიავლინე აწ ხელი შენი და შეახე ხორცთა მისთა, და იხილავ, უკუეთუ გაკურთხევს ჩუეულებისამებრ თვისისა“, და აჰა, მისცა რაი განსაცდელად ხორციცა შენი უფალმან, აღუკრძალა შეხებაი სულისა შენისაი, და დაგაწყლულა რაი ეშმაკმან კეთრითა, მწარეთა სალმოზათაგან ტანჯული არა დასცხრებოდი დიდებად ღმრთისა, აწ ჩუენცა გვიმოხე წინაშე მისსა, რაითა ბოროტისა მის მახეთაგან დაგვიცვას და აღგვძრას ქებად სიმხნისა შენისა და სიმტკიცისა:

გიხაროდენ, ერთგულებითა ღმრთისაითა და ჭეშმარიტებითა შემოსილო;

გიხაროდენ, ჭირვეულთა შემწეო და ყოველსა საქმესა კეთილსა შედგომილო;

გიხაროდენ, მართლითა მსჯავრითა, ვითარცა  
სამოსლითა შემკობილო;  
გიხაროდენ, ბოროტისა მის ეშმაკისაგან ხორციითა  
დაქენჯნილო;  
გიხაროდენ, აღურაცხელთა ურვათა და სალმოზათა  
თავს-მდებელო;  
გიხაროდენ, სასტიკთა წყლულთა და მატლთა  
მყრალობისა სიმდაბლითა დამთმენელო;  
გიხაროდენ, შიშითა ღმრთისაითა  
უნუგეშინისცემოისა მწუხარებისა დამტევნელო;  
გიხაროდენ, მარადიულისა სიხარულისა მსასოებელო;  
გიხაროდენ, კაცთაგან შეურაცხებისა სიმდაბლითა  
მიმღებელო;  
გიხაროდენ, მრავალვინებულო იობ,  
ყოვლადსაკვირველო მოძღვარო სოფლისაო!

#### კონდაკი 4

ჰხედვიდა რაი კაცობრივსა ბუნებასა აღმატებულსა  
დათმენასა შენსა, ნეტარო, აცდუნა ცოლი შენი  
ეშმაკმან, და მოუშვა რაი საყუედრელად შენდა, არღა  
განგიქარვა მან სალმოზანი, ვითარ შენ ლოცვითა  
განკაფავდი სენტა მისთა, და გრქუა: „თქულა სიტყუაი  
გმობისაი ღმრთისა მიმართ და მოჰკუდე“, გარნა  
გულისხმა-ყავ ზაკულებაი ბოროტისაი, და ეტყოდი  
სიმშვიდითა: „ჯერ არს, რაითა უფლისაგან მრავლისა

კეთილისა მომღებელთა ჭირიცა შევიწყნაროთ ხელთაგან მისთა“, და ადიდებდი ყოვლად პატიოსანსა და დიდშუენიერსა სახელსა მისსა: ალილუია.

## იკოსი 4

გხედვიდა რაი ცოლი შენი ყოვლითურთ დაცემულსა, არა შელბა შეწყალებად შენდა, იობ მართალო, და განგწირა ცთუნებითა, რამეთუ არცაღა მიეტევების კაცსა გმოზაი სულისა წმიდისაი, ხოლო შენ სიკუდილსა მიახლებული უფლისა მიმართ მიივლტოდი და მისგან ითხოვდი ნუგეშინისცემასა და შეწევნასა, აწ ჩუენცა გვითხოვე ღმრთისა მიერ, მოგუანიჭოს სიბრძნეი კეთილისა და ბოროტის განრჩევისაი, რაითა არა მივიდრიკოთ უსჯულოებისადმი, და ღირს-ვიქმნეთ შეწირვად შენდა სამადლობელისა ქებისა:

გიხაროდენ, მაღალსა ნებასა ღმრთისასა უზაკველითა გონებითა მინდობილო;

გიხაროდენ, გზასა მას მცნებათასა მისთასა შედგომილო;

გიხაროდენ, ჭეშმარიტისა სიკეთისა მხოლოი ღმრთისა თანა მხედველო;

გიხაროდენ, ხილულისა ცისა შუენიერებისა თვინიერ მისა არარად შემრაცხველო;

გიხაროდენ, ზეგარდამო მოვლენილთა ჭირთათვის  
ღმრთისაგან დატევებისა შიშისა განმცდელი;  
გიხაროდენ, სასოებითა მისითა მრავალფერთა  
ტანჯვათა დამთმენელი;  
გიხაროდენ, მწუხარებათა შინა საუკუნოისა  
ცხორებისა წინა-განმზადებისა განმჭურეტელი;  
გიხაროდენ, უსასრულოისა მის ცხორებისა  
გულისხმისმყოფელი;  
გიხაროდენ, უკვდავისა მის ნეტარებისათვის უფლისა  
მხმობელი;  
გიხაროდენ, მრავალვნებულო იობ,  
ყოვლადსაკვირველო მოძღვარო სოფლისაო!

## კონდაკი 5

შენ ზედა მოწევნულნი ძვირნი ეუწყათ რაი სამთა მათ  
მეგობართა შენთა, ნეტარო, მოისწრაფეს, და გიხილეს  
რაი სკორესა ზედა მჯდომარეი გარეშე ქალაქისა,  
მწუხარებითა შენითა მოწყლულთა დაიპეს  
სამოსელნი თვისნი, და მდუმარედ ისხდენ შენ თანა,  
ხოლო შენ მოიხსენე ყოველნი ჭირნი, რომელთა  
დაითმენენ კაცნი სოფელსა შინა, და ჰმადლობდი  
ღმერთსა, რომელმან შექმნა სიკუდილი  
განსასვენებლად დამაშურალთა, და ჰნატრიდი  
დამკვიდრებულთა საყოფელთა შინა მისთა, სადა

ყოველი მსახურებს და უგალობს შემოქმედსა:  
ალილუია.

## იკოსი 5

ვერცალა გულისხმა-ყვეს რაი სიწმიდეი შენი და  
სიმაღლეი სულისა შენისაი კაცთა მათ, მაღლად  
გამოიჩინებდენ თავთა თვისთა ღმრთისა მიმართ, და  
მხურვალედ გევედრებოდენ, რაითა აღუარო მას  
დაფარულნი ბრალნი შენნი და მოსდრიკო  
შეწყალებად, გარნა შენ მტკიცედ მიუგებდი -  
„უბრალო ვარ მე წინაშე უფლისა, რამეთუ გზანი  
მისნი დავიმარხენ და არასადა გარდამიქცევვის  
მცნებათაგან მისთა“, აწ ჩუენცა შეგვეწიე წინაშე  
ღმრთისა, რაითა გვიხსნეს ჩუენ სულთა  
წარწყმედელთა სწავლათაგან და ბრალთა შენდობაი  
მოგვმადლოს შემსხმელთა შენთა:

გიხაროდენ, ყოვლად შეუძრველო სვეტო სიმხნისაო,  
ბელიარისა მზაკუვარებათა განმხდელი;

გიხაროდენ, ბაგეთა შენთაგან სიცრუისა არცალა  
აღმომთქუმელი;

გიხაროდენ, საღმრთოისა განგებულებისა ვერ-  
შეცნობისა სიმდაბლითა ამლიარებელი;

გიხაროდენ, ძველისა აღთქუმისა მართალთა  
ცხორებისათვის ნათლისა მოფენისა მნებებელი;

გიხაროდენ, ახლისა ცისა და ახლისა ქუეყანისა

ყოვლითა სულითა მომლოდებელო;  
გიხაროდენ, სამსჯავროსა შინა მისსა უშიშად  
წარდგომისა მოსურნეო;  
გიხაროდენ, მფარველობისა მისისა ცრემლითა  
გამომთხოველო;  
გიხაროდენ, ღმრთეებრივთა მათ გზათა ბრძენო  
განმმარტებელო;  
გიხაროდენ, წარმწყმედელთა მწიკულთაგან  
განმარინებელო;  
გიხაროდენ, მრავალვნებულო იობ,  
ყოვლადსაკვირველო მოძღვარო სოფლისაო!

## კონდაკი 6

ჭეშმარიტად მოკლებულ იყუნეს რაი სიმართლესა  
მრავლისამეტყველნი მეგობარნი შენნი, ტანჯვასა შინა  
მყოფსა განგვიცხვიდენ და გწამებდენ ცილსა, რეცა  
ავასხებდი ვეცხლსა აღნადგინებითა და აჭირვებდი  
ქურივთა და ობოლთა, ჰოი, დიდსა მოთმინებასა  
შენსა, დიდო ვნებულო, რამეთუ სიმშვიდითა  
მიუგებდი: „არა არს სიცრუე ენასა ჩემსა, და უკუეთუ  
ესრეთ საჯა, ვინ არს სიტყვისმგებელ ღმრთისა?“ და  
ადიდებდი ძალსა მისსა: ალილუია.

## იკოსი 6

ვერცალა განსჭვრიტეს რაი უფლისა მიმართ ერთგულებაი შენი კაცთა მათ, გგუემდეს იგინი უმსჯავროითა ამით სიტყვითა: „საშინელსა იტყვი, ნუუკუე ღმერთი სჯისა მართალსა და ჰგუემს წმიდასა? უკუეთუ არა იყვნეს ცოდვანი შენნი დიდ, არამცა ესე შეგამთხვია“, გარნა შენ არცალა შეგაკრთო ყვედრებამან მათმან, ნეტარო, და ასწავებდი, რაითა დღენი მათნი განვლონ მორჩილებასა შინა უფლისასა, მას ევედრე აწ, რაითა დაიფაროს ერი ჩუენი ყოველთა ვნებათაგან და საცნობელნი განგვინათლნეს მაქებელთა შენთა:

გიხაროდენ, ღმრთისა მონაო, მდაბალო, გონებასა შინა შენსა მარადის სიკუდილისა მომხსენებელო;  
გიხაროდენ, აღსასრულსა შინა კაცისასა ღმრთისა განგებულებისა მჭვრეტელო;

გიხაროდენ, ჭეშმარიტისა სიბრძნისა მეძიებელო;

გიხაროდენ, სიმართლისა შენისა ხმამაღლად მქადაგებელო;

გიხაროდენ, ზრახუათა შინა მეგობართა შენთასა ღმრთისა მიმართ ლიქნისა მხედველო;

გიხაროდენ, მათგან ძვირმეტყველებისა მდაბლად დამთმენელო;

გიხაროდენ, წინაშე ყოვლისა ქუეყანისა სიწრფელისა

შენისა დამმოწმებელი;  
გიხაროდენ, სულითა გაუტეხელი, ბნელეთისა  
სულთა მძლეველი;  
გიხაროდენ, ჭეშმარიტად მოწამეობრივისა სიმხნისა  
მაჩვენებელი;  
გიხაროდენ, მრავალვინებულო იოზ,  
ყოვლადსაკვირველო მოძღვარო სოფლისაო!

### კონდაკი 7

მაშინ აღახვენ ბაგენი შენნი ქებად გამოუკვლეველთა  
გზათა უფლისათა და მიუწომელთა განგებულებათა  
მისთა, რომელმან თიხისაგან ქმნულსა მოგმადლა რაი  
ცხორებაი, მარადლე სცვიდა სულსა შენსა, და  
ღაღადყავ მისა მიმართ: „დაღათუ მართალ ვიყო, ვერა  
ძალ-მიც მე აღხილვად, რამეთუ სავსე ვარ გინებითა,  
გარნა არა გაანახლო ჩემ ზედა განკითხვანი და ნუცა-  
ლა მრისხავ წმიდასა ნებასა შენსა მინდობილსა“, აწ  
ჩუენცა მოგვანიჭე მხურვალეებაი სარწმუნოებისაი და  
აღგვძარ გალობად ღმრთისა: ალილუია.

### იკოსი 7

განწმედილი ეგე სახუმილსა შინა ურვათა და  
სალმობათასა, ვითარცა ოქროი გამობრწყინდი  
შუენიერებითა სულისა შენისაითა, და მომხსენებელი  
ყოველთა წყალობათა ღმრთისა მაღლისათა, კუალად

უგალობდი მას სასოებითა: „ნუ იტყვიედ ბაგენი ჩემნი უსჯულოებასა, რამეთუ მსახურებაი ღმრთისად არს სიბრძნეი, ხოლო ბოროტისაგან არს განშორებაი მისგან“, აწ ჩუენცა გვექმენ წინამძღუარ ცხორებისა და მეოხად ღმრთისა მიმართ, რაითა სიწმიდეი და შემუსრვილებაი მოჰმადლოს გულთა ჩუენტა, რომელნი ესე გიგალობთ და აღმოვსთქუამთ ქებულებათა შენთა:

გიხაროდენ, წინაშე მაღლისა მსაჯულისა გულითა მძრწოლვარეო;

გიხაროდენ, სიწრფოებითა გულისაითა მარადის ღმრთისა ხილვისა მოქენეო;

გიხაროდენ, შუებისა და ლხინებისა მის თანა მეძიებელო;

გიხაროდენ, ღმრთისა თანა ზრახვისა ღირსად თავისა თვისისა არღა შემრაცხველო;

გიხაროდენ, მის მიერ მოვლენილთა სასტიკთა განსაცდელთა შემწყნარებელო;

გიხაროდენ, სახარების მიერ უწყებულისა ჭეშმარიტებისა წინაისწარ მჭვრეტელო და აღმსარებელო;

გიხაროდენ, სასოებითა ზეციერისა ცხორებისაითა დავითსა, ესაიას, ეზეკიელსა და სხვათა წინაისწარმეტყველთა შესწორებულო;

გიხაროდენ, ყოველთა მართალთათვის

ზესთასოფლისა სიხარულისა მქადაგებელო;  
გიხაროდენ, რწმენითა შენდა შევრდომილთა  
განმამტკიცებელო;  
გიხაროდენ, მრავალვნებულო იობ,  
ყოვლადსაკვირველო მოძღვარო სოფლისაო!

### კონდაკი 8

გონება-მიუწვდომელ არს მორჩილებაი და სიბრძნეი  
შენი, მოსილი მადლითა და ძლიერებითა, რამეთუ  
არა ხოლო თუ მეგობართა შენთა ასწავებდი, ნეტარო,  
არამედ ჩუენცა აღგვავეს სასოებითა, იტყოდი რაი:  
„ქუეყნიერნი კეთილნი და ჭირნიცა ჰგიებენ  
მარჯუენესა შინა ღმრთისასა, და იგი მხოლოი  
მოწყლავს და აღადგინებს გამოუკვლეველითა  
სიბრძნითა და განგებულებითა თვისითა, რომელსაცა  
ვერა შეწვდების კაცისა გონებაი, გარნა ჯერ-არს  
მისდა, რაითა ყოველსავე მადლიერებითა მიიღებდეს  
და აკურთხევდეს ღმერთსა“: ალილუია.

### იკოსი 8

მართალთა სიტყუათაგან შენთა სირცხვილეულ-  
იქმნნეს და დადუმნეს რაი მეგობარნი შენნი,  
ღმრთივგანბრძნობილო, სხვაი იგი თანამოსაუბრეი  
თქუენი - ელიუს აღიძრა მხილებად შენდა, რაითა  
ბჭობაი შენი არცა შეგერაცხოს უსჯულოებად წინაშე

მსაჯულისა, გარნა არა შეიწყნარა უფალმან ქებაი მისი, რამეთუ გწამებდა ცილსა, და თავად განგეცხადა სათნომყოფელსა თვისსა, აწ ჩუენცა შეგვეწიე, რაითა ვიქმნნეთ მხედრობად ღმრთისა, წინა-აღმდგომად და დამამხობელად ყოველთა მტერთა მისთა, და გაქებდეთ, ვითარცა ჭეშმარიტსა მსახურსა მისსა:

გიხაროდენ, იობ, ღმრთივგანბრძნობილო და ნათელშემოსილო;

გიხაროდენ, ზეციერთა მნათობთა ცვალებისა სიბრძნითა გულისხმისმყოფელო;

გიხაროდენ, კეთილისა ნუგეშინისცემისა კაცთაგან ვერცალა მიმღებელო;

გიხაროდენ, საღმრთოისა მის და საუკუნოისა სიყუარულისა მსასოებელო;

გიხაროდენ, სამოთხისა კეთილთა მომლოდებელო;

გიხაროდენ, ჭეშმარიტისა მეოხისა ცათა შინა მგულვებელო;

გიხაროდენ, პირმოთნეობისა ბრძენო მამხილებელო;

გიხაროდენ, მეგობართა შენთა ღმრთისმოსაობასა შინა განმსწავლელო;

გიხაროდენ, უძლურებასა შინა

ღმრთივმონიჭებულისა ძლიერებისა შენისა გამომაჩინებელო;

გიხაროდენ, მრავალვნებულო იობ,

ყოვლადსაკვირველო მოძღვარო სოფლისაო!

## კონდაკი 9

არმურითგან და ღრუბლითგან გეტყოდა რაი უფალი დიდთა მათ საიდუმლოთა, რომელნი დაფარულ იყვნეს კაცთაგან, გეზრახებოდა შესაქმისათვის სოფლისა, და გამხილებდა, და გამოძღვრავდა შენ, წმიდაო იოზ, და გკურნებდა საკვირველად, ხოლო შენ მაღლიერებითა შეიტკობდი საღმრთოთა მათ სწავლათა და არცალა დასცხრებოდი დიდებად და გალობად ღმრთისა: ლილუია.

## იკოსი 9

არცა კაცთა მათ ენამზეთა ძალუმს ჯეროვნად ქებაი შენი, ნეტარო იოზ, რამეთუ მართლად სახელ-გდვა რაი უფალმან, მიწად და ნაცრად შერაცხავდი თავსა თვისსა, და მიუგებდი: „პირველ მესმინა შენთვის ყურთა მიერ, ხოლო აწ თუალმან ჩემმან გიხილა, და ვუწყი, რამეთუ ყოველივე ძალ-გიც და არა რაი არს შეუძლებელ შენგან,“ ეგრეთვე აწ ჩუენცა მოგვმადლე განცდაი თვისთა ცოდვათაი და გზასა მას სინანულისასა წარგვიმართე შემსხმელთა შენთა:

გიხაროდენ, ზეგარდამო მის მამხლებელისა ხმისა მორჩილებითა და სიმდაბლითა მსმენელო;  
გიხაროდენ, ყოვლადძლიერთა და საკვირველთა საქმეთა უფლისათა გულისხმისმყოფელო;

გიხაროდენ, წინაშე სიბრძნისა მისისა ყოვლითა  
სულითა ქედ-დადრეკილო;  
გიხაროდენ, კაცობრივისა ბრძნობისა არარად  
შემრაცხველო;  
გიხაროდენ, ყოველთა კადნიერთა სიტყუათა შენთა  
ცრემლითა აღმსაარებელო;  
გიხაროდენ, უგულისხმოებისა თვისისა გულისა  
შემუსრვილებითა ამლიარებელო;  
გიხაროდენ, ერთგულო მსახურო უფლისაო, მისა  
მიმართ ავლსა და ნაცარსა შინა მონანულო;  
გიხაროდენ, წყაროო დაუწყუედელო, სულითა  
სარგებელთა სწავლებათა აღმომადინებელო;  
გიხაროდენ, ცოდვილთათვის სინანულისა ბჭეთა  
განმღებელო;  
გიხაროდენ, მრავალვნებულო იობ,  
ყოვლადსაკვირველო მოძღვარო სოფლისაო!

### კონდაკი 10

ეწადა რაი ყოვლის მეცნიერსა ღმერთსა სიმართლისა  
შენისა წარმოჩინებაი, რისხვითა გულის წყრომისა  
მისისაითა რქუა ელიფას თემნელსა: „სცოდე შენ და  
მეგობართა შენთა, რამეთუ არა იტყოდეთ ჭემმარიტსა  
მსახურისა ჩემისა იობისათვის“, და უბრძანა მათ  
შვიდ-შვიდთა ზუარაკთა და ვერძთა მოყუანებაი  
შენდა, რაითა მსხუერპლი შეწირო და ილოცო

მათთვის, და აჰა, აღასრულეთ რაი ყოველი, შეუნდო  
მათ უფალმან, და ერთობითა აქებდით ძლიერებასა  
მისსა: ალილუია.

## იკოსი 10

ჰოი, საკვირველსა განგებულებასა ღმრთისა  
მაღლისასა, რამეთუ შემდგომად განსაცდელთა მათ  
მტერისაითა ღირს-გყო გამოცხადებისა თვისისა, და  
განგკურნა რაი სრულიად, ფრიად აღორძინდი, და  
რავდენ-იგი გაქუნდა პირველ, ყოველივე მოგცა  
ორწილად მოთმინებისათვის შენისა, აწ ჩუენცა  
შეგვაწყნარენ ღმერთსა, რაითა ულხინოს ნათესავსა  
ჩუენსა, და გარე წარგუხადოს ამონი შფოთნი და  
განსაცდელნი მოსავთა შენთა და მაქებელთა:

გიხაროდენ, სათნოებითა და ღმრთისა ერთგულებითა  
გამოჩინებულო;

გიხაროდენ, ხორციითა გვემულო და ცოდვათაგან  
გათავისუფლებულო;

გიხაროდენ, ძალითა უზესთაესითა განმტკიცებულო;

გიხაროდენ, წმიდითა ცხორებითა და ღმერთთან  
ერთობითა განბრწყინებულო;

გიხაროდენ, სიხარულისა და ჭეშმარიტებისა  
მხოლოისა ღმრთისა თანა მჭვრეტელო;

გიხაროდენ, მისა მიმართ სიყუარულითა უსასობისა  
მძლეველო;

გიხაროდენ, ზესთა სოფლისა საიდუმლოთა  
შთაწვდომილო;  
გიხაროდენ, მოთმინებითა შენითა და სიქუელითა  
ქუეყნიერებისა განმანათლებელო;  
გიხაროდენ, გზასა მას სასუფეველისასა კეთილად  
წარმმართველო;  
გიხაროდენ, მრავალვინებულო იობ,  
ყოვლადსაკვირველო მოძღვარო სოფლისაო!

### კონდაკი 11

სასოებაი შენი დადე რაი შემოქმედისა მიმართ,  
წმიდაო, დიდთა მათ მწუხარებათა წილ მრავალფერი  
ქუეყნიერი სიკეთეი მოგმადლა, რამეთუ მოგანიჭა  
შვიდ ძეი და სამ ასულ, ყოველთა უმჯობესნი, და  
დღენი ცხორებისა შენისანი განგიგრძო ფრიად, ხოლო  
აღესრულე რაი მხცოვანებასა შინა, კეთილნიცა იგი  
საუკუნენი დაიმკვიდრნე აღთქუმისაებრ უფლისა, და  
აწ გაქუს რაი მაदლი შეწევნისაი, ბაგენი ჩუენნი აღძარ  
გალობად მისა: აღილუია.

### იკოსი 11

ვიდრე მოსემდე და ქრისტემდე ცხოვნდებოდი რაი  
ქუეყანასა ზედა, ყოველთა საღმრთოთა მათ მცნებათა,  
გაქუნდა რაი გულსა შინა თვისსა, აღასრულებდი  
წადიერად, ხოლო განავრცო რაი უფალმან სული შენი

ტანჯვათა მიერ, დამტევნელ-გყო დიდთა  
საიდუმლოთა, რაითა იქმნე შენ მოძღუარ სასოებისა  
და ღმრთისა მიმართ სიყუარულისა ყოველთა  
შემდგომთათვის ნათესავთა, აწ ჩუენცა აღგვავესე  
შენებრითა სარწმუნოებითა და ახოვანებითა სულისა  
და გონებისაითა, რაითა ვსძლოთ ყოველთა მხდომთა  
და ორგულთა ჩუენტა, და ქებაი შეგასხათ ძალისაებრ  
ჩუენისა:

გიხაროდენ, ყოველთა ერთა შორის ქუეყანისათა  
ღირსად პატივცემულო;

გიხაროდენ, პირველ ფიქალთა ზედა სჯულის  
გამოწერისა მცნებათა შინა ღმრთისათა ცხორებულო;

გიხაროდენ, პირველ მაცხოვრისა მიერ  
უაღმატებულეს მცნებად ღმრთისა და მოყუასის  
სიყუარულისა დადებისა, საღმრთოითა

სიყუარულითა ცეცხლებრ აღგზებულო;

გიხაროდენ, ობოლთა და ჭირვეულთა მამობრივითა  
გულმტკივნეულობითა გამომზრდელო;

გიხაროდენ, ქრისტეის და წმიდათა მოციქულთა მიერ  
კაცთათვის უწყებულთა საიდუმლოთა საღმრთოითა  
ჭურეტითა წინაისწარ გულისხმისმყოფელო;

გიხაროდენ, უფლისა ძმისა იაკობისაგან მძვინვარეთა  
ტანჯვათა დათმენისა სახედ და ხატად  
სახელდებულო;

გიხაროდენ, რამეთუ მანვე მოციქულმან ქებაი შეასხა

ცხორებითა შენითა მინიშნებულსა სახელოვანსა  
აღსასრულსა უფლისასა;  
გიხაროდენ, რამეთუ წმიდისა მის წიგნისა შენისა  
კითხვასა ბრძანებს ქრისტეის ეკლესიაი კვირიაკესა  
მას ვნებისასა;  
გიხაროდენ, რამეთუ წმიდაი იოანე ოქროპირი  
მოგვიწოდს ბაძვად ახოვანებისა შენისა;  
გიხაროდენ, მრავალვნებულო იობ,  
ყოვლადსაკვირველო მოძღვარო სოფლისაო!

## კონდაკი 12

მხნეი და ძლიერ იყავ რაი ყოველსა ღუაწლსა შინა,  
აღიძრა მხდომი იგი და ბოროტი სული დახსნად  
შენდა, და გამოგითხოვა რაი ღმრთისაგან, მართალო  
იობ, არა ხოლო თუ ერთგზის, არამედ ორგზის,  
რაითა განგცადოს ნაშობითა და მონაგებითა, და  
დასდვა რაი შენ ზედა ბოროტი სალმობაი, ვერა  
გეუფლა შენ, გაქუნდა რაი ფრთენი სიმართლისანი,  
და ისარნი მისნი ვერა გეწია, აწ ჩუენცა მოგუმადლე  
ნათელი სიბრძნისა შენისაი, რაითა განვერნეთ  
საცთურსა სოფლისასა და მარადის ვაქებდეთ  
ღმერთსა, წმიდათა შორის საკვირველსა: ალილუია.

## იკოსი 12

ყოვლად პატიოსან და დიდებულ არს სახსენებელი  
შენი, წმიდაო იოზ, რამეთუ საშინელთა მათ ტანჯვათა  
შინა ჭეშმარიტითა სიმდაბლითა სძლე გამომცდელსა  
მას, და პირი დაუყავ უგუნურებასა მეგობართასა,  
რომელთა არა უწყოდეს ვნებისა მის შენისა  
საიდუმლოი, ყოვლად ქებულო, და ხმა-ყოფდი:  
„ნეტარ არს კაცი, რომელსა ამხილა უფალმან“, მას  
ევედრე აწ, რაითა ძლევადი მტერთა და საცთურთა  
ზედა მოგუმადლოს შემსხმელთა შენთა:

გიხაროდენ, დიდო მართალო უფლისაო, ყოველსა  
ქუეყანასა ქებულო;

გიხაროდენ, ღმრთისა მიერ სარწმუნოდ მონად მისად  
წოდებულო და სიწმიდესა მისსა მიახლებულო;

გიხაროდენ, ძველისა აღთქუმისა მართალთა თანა  
დავანებულო;

გიხაროდენ, მბრძოლო უძლეველო, მტერისა მახეთა  
შემმუსრველო;

გიხაროდენ, ცხორებითა შენითა ყოველთა თესლ-  
ტომთა განმსწავლელო;

გიხაროდენ, სიმაღლითა მით ახოვანებისა შენისაითა  
ყოველთა განმაკვირვებულო;

გიხაროდენ, მრავალთა ძვირთაგან ღელვა-გუემულთა  
მარადის ნუგეშინისმცემელო;

გიხაროდენ, ყოველთა მწუხარებათა შინა  
მომწოდებელთა შენთა მსწრაფლ-შემწეო და  
ხელისაღმპყრობელო;  
გიხაროდენ, მწუხარებათა ჩუენთა სიხარულად  
გარდამქცეველო;  
გიხაროდენ, მრავალვნებულო იობ,  
ყოვლადსაკვირველო მოძღვარო სოფლისაო!

### კონდაკი 13

ჰოი, ყოვლად ქებულო და ღმრთისა მიერ  
გამორჩეულო იობ, რომელმან დაითმინე ურიცხვნი  
მწუხარებანი და აჩვენე სრული სასოებაი საღმრთოისა  
განგებულებისაი, აწ მიითუალე შესხმაი ესე ჩუენი და  
შეგვეწიე წინაშე ღმრთისა, რაითა განჰკურნოს  
უძლურებანი ჩუენნი და დაგვიცვას საფრხეთაგან  
უხილავთა და ხილულთა მტერთაისა, რაითა  
სიწმიდითა და ღირსებითა განვვლოთ ჟამი ესე  
ცხორებისა ჩუენისაი, და ზეცათა შინა ღირს ვიქმნეთ  
დიდებად ყოვლადწმიდისა სამებისა: ალილუია.

*ეს კონდაკი იკითხება 3-გზის. შემდეგ იკოსი 1 და  
კონდაკი 1*

*შეადგინა თინათინ მჭედლოშვილმა*

*რედაქტორი ნონა ნამგალაძე*

